

Konferencija za medije visokog predstavnika nakon sjednice Vijeća za implementaciju mira



Brisel, 27. februar 2007. u 16.00 sati

Vijeće za implementaciju mira je upravo završilo sastanak i kominike na engleskom jeziku Vam je na raspolaganju. Prevod je također u pripremi i biće poslat medijima elektronskim putem i stavljen na OHR njeb stranicu što je prije moguće.

Kako sam ukazao ranije, naše diskusije, i jutros i sinoć, bile su konstruktivne. Na taj način, na kraju je postignut opšti konsenzus vezano za procjenu koju sam prezentirao Vijeću za implementaciju mira.

Kada je prvobitna odluka donesena u junu prošle godine da OHR prestane sa radom krajem juna ove godine, ona je trebala biti predmet “razmatranja i potvrde” početkom ove godine.

Kao što svi bez sumnje znate, predlagao sam produžetak mandata OHR-a od jedne godine na osnovu moje analize situacije.

U svojim diskusijama, juče i danas, na osnovu analize koju sam iznio Upravni odbor Vijeća za implementaciju mira je uzeo u obzir i pažljivo procijenio kako situaciju u Bosni i Hercegovini tako i u širem regionu. Nakon pažljivog razmatranja, Upravni odbor Vijeća za implementaciju mira

podržao je moj stav i odlučio da ne potvrdi prestanak rada OHR-a.

To znači da će OHR i dalje raditi i nastaviti da vrši svoj mandat u skladu sa Dejtonskim mirovnim sporazumom, obezbjeđujući puno poštivanje Mirovnog sporazuma.

Upravni odbor Vijeća za implementaciju mira se saglasio da radi na zatvaranju OHR-a do 30. juna 2008. godine, te da razmotri situaciju na sastancima u oktobru 2007. i februaru 2008. godine.

Međutim, trebao bih da jasno stavim do znanja da je tranzicija i dalje cilj. Zaista, Upravni odbor Vijeća za implementaciju mira je ponovo naglasio da je u interesu svih u Bosni i Hercegovini da preuzmu punu odgovornost za sopstveno djelovanje i da politika preuzimanja odgovornosti i dalje ostaje vodeći princip.

Vremenski okvir za tranziciju koji je dogovoren prošle godine je očigledno bio ambiciozan, imajući u vidu da je to bila izborna godina u Bosni i Hercegovini i da je trebalo donijeti ključne odluke na drugim mjestima u regionu.

Jasno je da je u međuvremenu postignut napredak. Održani su izbori koje su u potpunosti organizovale vlasti Bosne i Hercegovine i vlade su prvi put formirane bez izričitog miješanja međunarodne zajednice.

Bezbjednosna situacija je nastavila da se poboljšava, i stabilna je i dalje.

Privreda nastavlja da se razvija stopom od oko 5 % godišnje.

Međutim, na političkom planu, vlasti Bosne i Hercegovine tek treba da dorastu izazovima preuzimanja odgovornosti. Pored toga, situacija u regionu je i dalje potencijalno nestabilna.

U takvim okolnostima, ostanak OHR-a je za sada i najrazumnija i najodgovornija politika.

Proces tranzicije neće biti onako brz kao što smo predvidjeli u junu prošle godine, ali je tranzicija i dalje cilj i OHR će usredsrediti svoje napore da se prelazak na puno preuzimanje odgovornosti završi u toku perioda produženja mandata.

Politički direktori Vijeća za implementaciju mira su jasno naglasili da će međunarodna zajednica nastaviti da pomaže Bosni i Hercegovini da napravi konačne korake iz faze implementacije mira ka Evro-atlantskim integracijama što je prije moguće.

Danas smo pratili izlaganje predsjedavajućeg Vijeća ministara, Nikole Špirića, koji je iznio program svoje vlade.

Program predsjedavajućeg Vlade je ambiciozan i na vrh dnevnog reda postavlja preduslove za potpisivanje Sporazuma o stabilizaciji i pridruživanje sa Evropskom unijom.

Upravni odbor Vijeća za implementaciju mira naglasio je važnost potpisivanja Sporazuma o stabilizaciji i pridruživanju i pozvao političke vođe da ispune uslove za njegovo potpisivanje, a naročito, što je prije moguće, sporazum o implementaciji i vremenskom okviru za reformu policije.

Politički direktori Vijeća za implementaciju mira upozorili su da propuštanje rokova u martu može dovesti do značajnog odlaganja potpisivanja Sporazuma o stabilizaciji i pridruživanju i pozdravili su moju ponudu da pomognem u postizanju sporazuma.

Na ovaj način i ja ću se usredsrediti na preduslove za Sporazum o stabilizaciji i pridruživanju do kraja mog mandata na funkciji visokog predstavnika i specijalnog predstavnika Evropske unije, kao i na unapređenje procesa ustavnih reformi.